

# Athör cï Paulo gät Tito

## Wët nom

Athör kënë aci Paulo gät Tito riénythii tō Kret raan ye ye kony, yen cï Paulo nyääñ piny bi akut kōc cï gam lōk biōōk. Athör ē jam wēl kadiāk ril apei.

Wēt tueñ, Tito a lēk bi tē ye kōc cï Nhialic gam luui thīn bi buōōth yic, rin kōc juēc pan Kret aci path. Wēt dēt, ee wēt Tito tē bi yen kōc juēc cï gam pan Kret ya piōōc thīn, rōōrdit ku diāardit, ku riénythii ku aloony aya. Ku jōl diāardit diāārkor ya piōōc. Wēt ciēn, Paulo ē Tito lēk tē bi kōc cï gam cieñ thīn, bik rēer ke mēt ku dōōr ke cīn agōth, ku cīn tiēl bi kōc cï gam rēer keye tōk.

## Kāk tō thīn

Muōth tueñ .....	1:1-4
Luoi Tito pan Kret.....	1:5-16
Luoi akut kōc cï gam.....	2:1-15
Cieñ peth Krithiaan.....	3:1-11
Muōth ciēn.....	3:12-15

**1** Athör Paulo aluañ Nhialic ku ye atuny Jethu Kritho cï tuōc Tito. Yen ēci kuany ku toc ya ba kōc cï Nhialic kuany bēēi gam yic bik pīr akōlriēc ēbēn yōk, ku ŋickē yic kōc yāth tēnē Nhialic, <sup>2</sup>yen tō ŋōth ē pīr akōlriēc thīn. Nhialic cīi lueth ye lueel, aci yo thōn ē pīr kēnē wāthēer ke piny kēc cak. <sup>3</sup>Lōñ ē pīr aci Nhialic nyooth ku tuuc yen ē rielde kek Aluāñda Jethu ba bēn lēk we.

<sup>4</sup>Yīn agāt athör Tito manhdiē Nhialic nom, cuk gam yodhie. Bi dōōr ku dhēñ Nhialic Wāda kek Wēnde Jethu Kritho Aluāñda rēer kek yī.

## Luoi Tito pan Kret

<sup>5</sup>Yīn aca nyiāñ pan Kret, ba kāk kēc rōt cōk wāar lōk cōk. Ku kuany kōcđit bik akuut kōc cï gam wat nhīim ē gēeth pan Kret yiic ēbēn cit tē cï yen ye lēk yī thīn. <sup>6</sup>Raandit wat akut nom adhil a raan luoi akut

---

1:4 2Kor 8:23; Gal 2:3; 2Tim 4:10    1:6-9 1Tim 3:2-7

kɔc cī gam looi apath, ku aci thiëek tieŋ tók. Ku miëthke aadhil aa kɔc cī gam ku lek gup athëëk ku cik nhīim ril. <sup>7</sup>Këya, raan wat akut kɔc cī gam nom yen ë raan luoi kāk ë Nhialic, adhil a raan path cīi nom ril, cīi pušu lac dak ku cīi ye wiet ë mäau ku cīn guöp aköök, ku cīi ye bath wëëu. <sup>8</sup>Adhil aa biökruual ku nhieer luoi këpath, adhil a raan ë rot duut, la cök ë Nhialic nom ku peth. <sup>9</sup>Ee raan dhil wët Nhialic muk piände ëbën cit të cī ye piöcc thīn. Këya, abi kɔc kök rieel puoth wët Nhialic cie lueth yic, ku nyuth kɔc kuc ë wët kënë lɔn ye piöccde yic.

<sup>10</sup>Rin kɔc juëc aake cī kuc, ku alanden kɔc Itharel cī gam bik bën Jethu cök, aa kɔc bën liäp nhīim ë lueth ye kek kɔc wëŋ nyīn. <sup>11</sup>Aŋuëën bi ke yöök bik köcc ë jam, rin liëp kek kɔc nhīim bëëi yiic piöccden ræc kënë wët wic kek wëëu ë path tënë kɔc yekë ke piöcc. <sup>12</sup>Raan tók pan Kret ë kam kacken kāk Nhialic tieŋ aci yic luel ëlä, “Kockuan pan Kret aa lueth, aa läai, aa dak röt cie luui, aa köör ë miith.” <sup>13</sup>Rin wët kënë adhil wek ke aa miëk nyīn thīn apei, bik kepuoth waar bik wët Nhialic gam kepuoth ëbën. <sup>14</sup>Ku cikë ben aa luui wël kɔc Itharel, wël cit anyikööl, lööŋ kɔc cī kuc ë wët yic. <sup>15</sup>Tënë kɔc yer puoth ëbën aa cīn yiic ajuëc, ku tënë kɔc col puoth kãŋ ëbën aa la yiic ajuëc rin aaci wel nhīim ku piäthken aaci yith kuc. <sup>16</sup>Ku ayekë luel lɔn ŋic kek Nhialic, ku aye kāk yekë ke looi nyooth lɔn cīi kek ye ŋic. Acin kë ye kek piath thīn, aa cīn gup athëëk ku acin këpeth yekë looi.

### Kë la cök dhil piöcc

**2** Yin adhil kɔc piöcc wët Nhialic ë yic. <sup>2</sup>Lëk kacdit bik kegup aa theek ku yekë röt tiit, ku gamkë Nhialic ë pušu ëbën, ku nhiarkë röt ku dhilkë gum aya. <sup>3</sup>Lëk diäardit aya bik aa diäär thek Nhialic. Ku cik wël ye dhëeth, tädë ke yik röt mäau. Ku yekë diäarkor nyuoth këpath. <sup>4</sup>Ku nyuuthkë diäarkor bik rörken ku miëthken nhiaar. <sup>5</sup>Ku bik röt muk apath bi ciën karec ye luël kegup. Ku thekkë rörken gup, bi ciën raan rac dhäl wët Nhialic yic rienken.

<sup>6</sup>Këya, yin adhil riénythii aa deet puoth aya bik röt aa muk apath. <sup>7</sup>Yiin aya, adhil nyooth lɔn ye yin raan athëëk path ye kiëet ku ŋic piöcc. <sup>8</sup>Ye jam wël la cök rin bi ciën raan dhäl yiguöp, bi kɔc aterdu ciën nyin yökkë bi kek yo aa jääm gup.

<sup>9</sup>Piöcc aloony bik banyken aa miëet puoth kuat kāk yekë ke looi akölaköl, ku cik wëlken ye jöony, <sup>10</sup>ku cik ye cuëer aya. Ku bik nyooth lɔn ye kek kɔc path akölaköl cīn kë ye ke diëu thīn, ku bik nyooth aya lɔn peth piöcc rin Nhialic Aluãnda kuat kāk yekë ke looi yiic.

<sup>11</sup>Rin Nhialic aci tē puoth yen thīn nyuoth, rin cī yen bēn bī raan ēbēn ben luōk pīr. <sup>12</sup>Dhēēnde ē yo lēk buk pīr rac ku kāk pinynhom puōl. Ku buothku pīr path yic, pīr lōŋ Nhialic pinynhom ē tēn, <sup>13</sup>ke yo tit akōl cī dōc yen ŋāthda, tē bī diik Nhialic ril apei ku Jethu Krītho Aluāŋda rot nyuoth. <sup>14</sup>Bānyda Jethu aci rot gam bī nōk rin bī yook kony kuat kārec ye raan ke looi yiic, ku cōl yo aaye kōc cī kegup wuōōny wei, ku yeku kacke yetōk ku yeku nhiaar diēt yeku looi kēpath.

<sup>15</sup>Piōōc kākkā rieldun tō ke yī. Ku ye ke dēt puoth ku miek kōc piōōc ke nyin thīn. Ku duk raan tōk ē path pāl bī yī dhōl guōp.

### Cieŋ peth Krīthiaan

**3** Lēk kōc bīk ŋic lōn ē luōiden bīk bāny baai ku lōōŋ mec baai theek ku loikē kāpath. <sup>2</sup>Lēk ke bīk kōc kōk cīi ye lom ku yekē kōc ē kōc dōōr, ku mēēthkē kamken ku yekē rōt nyuoth akōlakōl lōn ye kek kōc path tēnē raan ēbēn. <sup>3</sup>Yook thēer yōk aa yo ye luui kārec, acīn kēnē ŋicku, yōk aa yo cīn gup athēēk, ku yeku aloony kārec ye piāthkua wīc ēbēn. Yōk aa yo la gup kuith ku tiēl ye ke yo maan kōc kōk ku manku ke aya.

<sup>4</sup>Nawēn cī piath ku nhiēr Nhialic yen yo kony rot nyuoth, <sup>5</sup>ke kony yo. Ku acie rin kāpath cuk looi, ee rin yer yen puōu. Acī yo kony ē lōkwēi cī yo ben dhiēēth riēl Nhialic ē yic, ku ben yo cōl aaye yam dhēēŋ Wēi Nhialic, <sup>6</sup>cī gām yo ē path rin Jethu Krītho Aluāŋda. <sup>7</sup>Ku bī dhēēnde yo cōk piny Nhialic nhom, ku buk pīr akōlriēc ēbēn yeku ŋōōth yōk. <sup>8</sup>Kēnē yen ē wēt yic, detkē yic apath, rin bī kōc rēēr ke cī Nhialic gam, aa rēēr ke loi kāpath ē raan ēbēn kony.

<sup>9</sup>Pālkē jam cīn kē ye kuōny kōc rin wārkuan dīt thēer. Ku ater ku agōth rin lōŋ, rin kākkā ēbēn aa cīn kē ye yōk thīn. <sup>10</sup>Wēēt raan rac kēn yic tōk ku rou, ku pāl tē cīi yen ye gam. <sup>11</sup>Ŋic lōn ye raan cīt kēnē raan rac, ku aye kākken rec ye looi guō nyuoth.

### Muōth ciēn

<sup>12</sup>Tē le Artemath ku Tikikuth yet tēnē yī, ke yī lōc bēn tēnē ya gen Nikapolith rin awiēc ba pēi rut thōl ē tēēnē. <sup>13</sup>Luōōi apath ba Dhenath raan lōōŋ ku Apolo kony kēnyden yic, yiēk ke kuat kē wickē ē cāth yic. <sup>14</sup>Adhil kackua ŋiēc bīk cīi ye rēēr ke cīi lui, aa dhil aa luui kāpath wīc piērden, acīk lēu bīk pīr pīr rac.

<sup>15</sup>Kōc rēēr ke yen ēbēn aa we muōōth. Muōth kōc nhiar yo miēthakua le yōk gam tōk. Dhēēŋ Nhialic abī rēēr kek we ēbēn.

2:14 Wk 130:8; B.bei 19:5; L.rou 4:20; 7:6; 14:2; 1Pit 2:9

3:12 Luōi 20:4; Epe 6:21-22; Kol 4:7-8; 2Tim 4:12 3:13 Luōi 18:24; 1Kor 16:12